

CASTI



Angal cun en spievel èn da vaseir igls autos tgi vignan da sotanse sen la veia principala. Igls autos da posta ston magari spitgier dei per antrar dalla staziun da Casti ainten la veia principala.

FOTOS RTR

ASTRA refusescha tempo 30 ed ampla alla staziun

Igl cumegn d’Albula/Alvra less installar en’ampla ed introduceir tempo 30 tranter igl tancadi e la staziun da Casti. Igl Uffezi federal da veias ASTRA refusescha dantant tottas dus dumondas. Igl cumegn n’è ansomma betg cuntaint cun chella decisiun.

RTR/FMR SURMIRAN

Eir dalla veia dalla staziun da Casti ainten la veia principala è per igls automobilists ena sfeida quotidiana. Igl traffic circulescha cun 50 kilometers per oura e la vista sen vehichels tgi s’avischignan è dada savens pir igl davos mument. Er pedungs tgi lessan contanscher la buteia digl tancadi dall’otra vart dalla veia on fadeia da traversar la veia a moda sieira, noua tgi mantga ena streffa melna. Igl cumegn d’Albula/Alvra vei ainten ena zona da tempo 30 la migl-

ra schliaziun per chella situaziun precara. Ena dumonda correspondententa agl Uffezi federal da veias ASTRA, agl qual la veia principala è sotamessa scu veia naziunala N29, è dantant neida refusada. Er la proposta dad installar en’ampla n’ò catto nign consentimaint digl uffezi federal.

Pacs accidents per igl ASTRA
Igl ASTRA argumentescha la sia refusada scu suonda: igl tratg tranter igl tancadi e la staziun na seia betg en li cun blers accidents tgi giustiftigess

ena zona da tempo 30. Igl cumegn d’Albula/Alvra vei chegl dantant oter. Tranter igl 2022 ed igl 2024 ègl do set accidents ainten chel li, egn da chels schizont cun ena persunga grev blessada, ò detg Patrizia Zannini, la vicemastrala digl cumegn d’Albula/Alvra, anvers RTR.

Er l’installaziun d’ena ampla fronta sen resistenza digl Uffezi federal da veias ASTRA. Bagn vei chel en avantatg per autos da posta, igl disturbì per la circulaziun digl traffic sen la veia principala seia dantant mengia grond.

Patrizia Zannini crititgescha chella tenuta: «Autos da posta on savens retard, percheigl tg’els ston spitgier per antrar ainten la veia principala.» Igl cumegn na less betg sa cuntantar cun la rasposta negativa digl ASTRA. Scu proxim pass vigna el a communitgier an scretg agl uffezi federal tg’el na geia betg d’accord cun la refusada, ò declaro Patrizia Zannini. Igl davos pled an tgossa n’è damai betg anc plecto. La speranza digl cumegn d’Albula/Alvra è venavant, da pudeir nizigier sinergeias an connex cun la renovaziun dalla staziun da Casti tgi antscheva igl onn tgi vign.

SURSES

Turnos dalla festa scu victours

A Coira vignan eruias dumengia igls rètgs da teir. An concorrenza stattan er tiradours grischuns. Igl 1985, cura tgi la festa da teir naziunala ò er gia li a Coira, ò l’Uniun da pistolas Surses gudagnea l’occurrenza da secziuns.

GION NUTEGN STGIER/FMR SURMIRAN

Dumengia proxima vo a fegn la 59avla ediziun dalla Festa da teir federala a Coira. A partair dalas 12.30 on li igls gronds finals dall’occurrenza naziunala. Eruias vignan an tschintg categorias igls rètgs da teir (varda box). Scu tar mintga festa da teir federala dattigl er ena concorrenza dallas uniuns u societads da teir. Chegl è per exaimpel er sto igl cass igl 1985 cura tgi la festa da teir federala ò gio gia li a Coira. Dalla parteida èn lò stos durant igls 26 deis 80 000 participants e participantas. Sen 300 meters stavan a disposiziun a tiradours e tiradouras 270 schebas electronicas.

Egn digls miglers clubs dalla Svizra Orientala
Er sa participo all’occurrenza da teir federala ò igl 1985 igl Club da pistolas Surses. Da chel taimp tutgiva chel tar egn digls pi fermes clubs dalla Svizra Orientala. Tranter igls commembers sa cattava l’egn u l’oter tiradour tg’è sto tar festas da teir regiunals e schizont cantunals segl podest. Alla festa da teir federala a Coira igl 1985 è igl Club da pistolas Surses sto cun ena delegaziun da radond 20 tiradours. Chels on alloura er tratg precis e bagn, schi bagn tg’ò tanschia da gudagner la concorrenza da secziun dalla 4. categoria.

Retschets dalla Musica instrumentala Savognin
Blers tiradours da chella delegaziun da pistolas da success èn gio morts e chels tgi veivan anc on tranter 75 ed 88 onns. Chegl èn per exaimpel Renzo Cavegn, Guido Camous e Meltger Poltera da Savognin. Guido Camous sa regorda cunzont agl grond bavagnaint a Savognin, cura tg’ins seia tur-

no da Coira. Cun betg aver l’Uniun da pistolas Surses ena schinumnada standarta (bandiera), ins veva fatg diever dalla bandiera digl circuit. Guido Camous ò rachinto tgi la Musica instrumentala Savognin vegia retschet la delegaziun cun turnar da Coira scu victoura da secziun.



La delegaziun digls tiradours da pistola da Surses avant 41 onns, pronta pigl til tras Savognin, siva digl success a Coira tar la Festa da teir federala 1985.

FOTO MAD



Igl Jauer Elmar Fallet ò bungas schanzas da davantar rètg da teir cun la pistola.

FOTO GION NUTEGN STGIER

Rètgs e reginas da teir

Dumengia proxima vo a fegn la Festa da teir federala a Coira. Chel de on li igls gronds finals dall’occurrenza naziunala. Eruias vignan an tschintg categorias igls rètgs da teir. Per neir aint igl final on igls participants e las participantas gia da trer ples stetgs. Tratg vign er aint igl final ena qualificaziun e siva da chella vignan cuagl sistem da cup eruias igls rètgs da teir. Sen la distanza da 300 meters teiran per categoria (A, D, E) mintgamai 45 tiradours 30 schozs. Siva da chels sa maseiran alloura igls otg miglers per erueir igl rètg da teir da mintga categoria. Er sen la distanza da 25 meters e 50 meters dattigl en rètg da teir. Sen la distanza da 300 meters ainten la categoria D (arma 57/03) è da supponer tgi Norbert Cavierzel da Tumeigl, el tg’è alla testa dalla rangaziun intermediara, savess defender igl sies tetel da rètg da teir gudagnea igl 2021 tar la festa da teir federala a Lucerna. Bungas schanzas da davantar rètg da teir cun la pistola ò alloura er Elmar Fallet da Mùstair. Da batter ò el pero Hansruedi Görti, igl tiradour appenzelles tg’è alla testa dalla qualificaziun intermediara avant igl Jauer. (fmr/gns)